

BOSNA I HERCEGOVINA  
Federacija Bosne i Hercegovine  
Tuzlanski kanton  
OPĆINA GRAČANICA  
OPĆINSKO VIJEĆE

Broj predmeta: 01-05-00333-2015  
Broj akta: 05EN-001  
Gračanica, 4.2.2015.godine

Z A P I S N I K  
SA 26. SJEDNICE OPĆINSKOG VIJEĆA  
GRAČANICA

Održane dana 29. 12. 2014. godine u sali za sjednice nove zgrade Općine Gračanica sa početkom u 11,00 sati.

Sjednici je prisustvovalo svih 30 članova Općinskog vijeća.

Sjednicu je otvorio i istom predsjedavao Edin Ibrišević predsjedavajući Općinskog vijeća Gračanica, zajedno sa zamjenikom Seadom Gazibegovićem i sekretarom Zehrom Mujačić.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Vijeća sjednici su prisustvovali i Općinski načelnik Nusret Helić, pomoćnik načelnika za odnose sa javnošću Azra Mustajbašić, Jasminka Imširović Općinski pravobranilac, šefovi službi za upravu: Zijad Dedić, Aida Hodžić i Mustafa Bajić, izvjestioci Vanesa Mahmutović i Zaketović Saima, grupe građana iz Lohinje i Pribave, Donje Orahovice i Lukavice, predstavnica Plenuma Gračanica Larisa Šuša, član Etičke komisije Smajlović Zumra, te predstavnici sredstava informisanja.

Zapisnik sa 25. sjednice Općinskog vijeća Gračanica usvojen je jednoglasno.

Predsjedavajući Vijeća je pozvao nove vijećnike Sinanović Jasnu i Mujkić Mirsada da daju svečanu izjavu o prihvatanju mandata i istu da potpišu.

Prije prelaska na rad, upoznao je prisutne članove a i javnost da je došlo do promjene u klubu vijećnika SDU, SBB. Klub se povećao za jednog vijećnika i nosi naziv SDU, SBB i BOSS, tako da se u tom klubu nalazi i vijećnik Mešić Fadil koji je ujedno i zamjenik predsjednika kluba.

Nakon tog pitanja i inicijative kandidovali su slijedeći vijećnici:

Tursunović Esad:

„Neću postavljati teška pitanja, teške teme.Ovom prilikom samo da se zahvalim načelniku i službi koja je formirala komisiju i koja je izašla drugi ili treći dan na teren vezano za upotrebnu dozvolu.Još da samo kažem da ne trebamo dozvoliti takve trenutke da petnaest ili šesnaest mjeseci se čeka. Malo dobre volje i sve se riješi.Radi se o Komisiji za tehnički prijem. Hvala“

Begović Rukija:

„Ujedno želim svima da čestitam 2015.godinu i zaželim puno uspjeha i da nam se nikad ne ponovi 2014.godina sa svojim elementarnim nepogodama.Moje vijećničko pitanje upućeno je direktoru Javne ustanove Bosanski kulturni centar Gračanica i tiče se tzv. Treće faze BKC-a.Riječ je o objektu koji je ranije bio predmet određenih nedoumica i kontroverzi, kao i različitih pravnih sporova.Zamolila bih direktora Bosanskog kulturnog centra za informacije o pravnim postupcima vezanim za ovaj objekat, u kojoj se oni fazi danas nalaze, a također i za podatke o strukturi vlasništva nad pojedinim prostorima u Trećoj fazi BKC-a, u prvom redu stanovima koji se u njemu nalaze, čije su vlasništvo, na koji način je ono stečeno i tako dalje.Unaprijed se zahvaljujem na odgovoru“.

Sulejmanović Osman:

„Moja inicijativa upućena je prema Općinskom načelniku i Službi za prostorno uređenje, geodetske i imovinsko-pravne poslove da privredno društvo „ISOWOOD“ Gračanica oslobode komunalne takse u postupku izdavanja odobrenja za gradnju.

Obrazloženje: d.o.o. „ISOWOOD“ iz Gračanice ima proizvodne kapacitete u području Sprečkog polja je u proteklim poplavama pretrpio veliku materijalnu štetu.Ovo preduzeće vrši izmiještanje svoje proizvodnje na novu lokaciju u Stjepan Polje odnosno Stankove bare, gdje traži potrebnu dokumentaciju za građenje.U tom postupku određena mu je komunalna taksa u iznosu od 2.402,00 KM.Obzirom da se radi o općinskoj taksi i činjenici da je ovo preduzeće pretrpilo ogromnu materijalnu štetu pozivamo nadležne da razmotre ovu inicijativu i istoj udovolje“.

Ahmetašević Jasmina:

„U ime građana i u svoje lično ime, podnosim inicijativu prema načelniku Općine, a odnosi se na sanaciju dijela puta prema džamiji i zaseoku Ahmetaši u MZ Donja Lohinja. Obrazloženje:U toku majskih poplava došlo je do oštećenja ova dva puta.S obzirom da se oba puta nalaze pored Lohinjske rijeke dolazi do stalnog osipanja i podravljanja ova dva puta.Ukoliko se ta oštećenja ne saniraju jedna dionica puta prema zaseoku Ahmetaši bit će potpuno zatvorena za saobraćaj.Zbog toga predlažem da se ovaj problem riješi u što kraćem roku“.

Čamdžić Mirsad:

„Ovom prilikom želim da čestitam novoizabranim koleginicama i kolegama i poželim puno sreće s nama u radu u vijećničkim klupama.Ja sam pripremio jednu inicijativu za koju želim da se čuje sa ove govornice, ali prije toga da se zahvalim kolegini Rukiji na pokretanju ovog pitanja.To je jako bitno pitanje i mislim da će se uskoro i riješiti.Isto tako sve informacije o ovome se mogu dobiti i od tadašnjeg načelnika Muhameda Ibrahimovića, kako se ovo nebi vezalo za neke emisije Radio Gračanice.Naša stranka zahtijeva od političkih subjekata koji će činiti većinu na nivou Federacije BiH, ali i na nivou Tuzlanskog kantona, da se očituju o načinu rješavanja statusa i prava radnika: Dite, Aide, Livnice, Konjuha i gračaničkih propalih firmi. Dugoročna revizija kriminalnih privatizacija, kao jedini instrument na raspolaganju, ne nudi rješenja za dnevne probleme radnika i njihovih porodica, ipak smatramo da odgovarajući organi ne smiju, kao do sad, dopuštati privatnim vlasnicima da mjesecima ne uplaćuju doprinose.Pored toga, ne smije se zanemariti ni pozicija vlasničkih udjela države, te onih koji su imenovani da upravljaju tim dijelom kapitala, bilo da je riječ o većinskom ili manjinskom udjelu.Stoga će Naša stranka, kao i prije par godina, tražiti izmjene zakona, kako bi vlasnici koji ne uplaćuju doprinose radnicima postali krivično odgovorni.Samo tako mogu se izbjeći situacije u kojima će radnici biti prikraćeni za najosnovnija prava, a vlasnici „ispumpavati“ vrijednost jeftino plaćenih preduzeća“.

Gadžić Rahim:

„Ja imam jednu inicijativu u ime Kluba vijećnika SDA. Inicijativa je za izmjene Statuta Općine Gračanica. Klub vijećnika SDA traži da se pristupi izmjenama Statuta Općine Gračanica u članu 29. Predsjedavajući Općinskog vijeća svoju dužnost obavlja umjesto riječi PROFESIONALNO da stoji riječ NA VOLONTERSKOJ OSNOVI. Da član 29. Statuta Općine Gračanica: Predsjedavajući Općinskog vijeća svoju dužnost obavlja na volonterskoj osnovi, a zamjenik predsjedavajućeg svoju dužnost obavlja na volonterskoj osnovi.

Zašto idemo sa tom inicijativom. Idemo iz razloga što se često na društvenim mrežama piše kako se mogu vršiti uštede na opštinskom budžetu. Interesantno je što se u javnosti priča šta se sve može uraditi, a ovdje je mjesto gdje se treba uštedjeti i može se uštedjeti kad je u pitanju budžet i to na sjednicama Vijeća se može o tome odlučivati. Mi tražimo da se na januarskoj sjednici razmatra, a da Stručna služba pripremi materijal i da se Statut Općine u narednom periodu izmijeni kako bi mogli u 2015. godini u budžetu uštedjeti ogromna sredstva. Da se nebi više pričalo šta treba uraditi da se uštedi, mi tražimo da Stručna služba pripremi materijal za januarsku sjednicu“.

Mešić Fadil:

„Ja imam jednu inicijativu upućenu Općinskom načelniku. Nakon katastrofalnih poplava na inicijativu 7 privrednih subjekata koji su najviše stradali u majskim poplavama pokrenuta je aktivnost na uređenju korita rijeke Spreče u industrijskoj zoni Gračanica. Dopis je upućen općinskom načelniku 25.06.2014. godine. Dopisi su pored Općinskog načelnika upućeni i Agenciji za vodno područje rijeke Save. Dana 04.07.2014. godine nakon obilaska terena na zajedničkom sastanku predstavnika općine, privrednika i predstavnika Agencije za vodno područje rijeke Save data je podrška inicijativi od predstavnika Agencije. Jedan od zaključaka je da općina bude nosilac projekta, odnosno da se u što kraćem roku kandiduje za budući projekat. Molio bi potpunu informaciju kakva je trenutna sudbina tog projekta, a načelnik bi o tome mogao dati više informacija“.

Safet Pjanić:

„Imam jedno pitanje pa bih molio odgovor od načelnika ili od nekog drugog ako ima saznanja, a radi se o sledećem. Evropska unija je negdje u novembru izdala javni poziv za dodjelu nepovratnih sredstava za pomoć i oporavak od poplava i podijeljeno je negdje oko milion ipo EUR-a tih sredstava za te namjene. Odabrano je 45 malih sitnih preduzeća iz 26 općina naše države i ja pitam zašto nikog nema iz Gračanice da aplicira na taj javni poziv? Primjera radi, Doboj je dobio 240.000,00, Maglaj 420.000, a evo za vašu spoznaju Odžak je dobio 70.000,00, a oni su to za firmu Majić, koji je vidio vodu samo kad je kiša padala na krov mlina. Toliko“.

Selimović Senad:

„Prije nego podnesem inicijative-imam dvije lijepe vijesti. Donosim vam dvije veoma lijepe vijesti, a dolaze nam iz MZ Trnovci:

1. Općinsko vijeće Gračanica je ove godine dodijelilo priznanje „Zlatna značka“ prof. sporta Sanelu Zaketoviću iz Trnovaca, koji je zaposlen u JU OŠ „Džakule“ u Džakulama. Da je priznanje otišlo u prave ruke i zaslužen, pokazuje nam i ovogodišnje priznanje Sportskog saveza Općine Gračanica za 2014. godinu. Prof. sporta Sanel Zaketović je proglašen od Sportskog saveza Općine Gračanica najuspješnijim nastavnikom, a JU OŠ „Džakule“ u Džakulama, proglašena je kao najbolja škola u oblasti sporta. Hvala Sanelu, hvala našoj omladini i hvala svima koji su prepoznali rezultate. Želim svima mnogo sreće i uspjeha u budućem radu.

2.U MZ Trnovci (naselje Šabići) izgrađen je bazen za pitku vodu. Hvala načelniku i hvala svima koji su pomogli u izgradnji bazena za vodu.

Inicijativa ide prema Elektroposlovnici Gračanica:

Tražim da se MZ Džakule, Trnovci, P.Brdo, Doborovci i G.Doborovci umreže u elektrosistem sa prostora Općine Gradačac. Razlozi su svima nama mnogo poznati.Malo jači vjetar ili kiša, snijeg ili bilo kakva druga nepogoda, navedene MZ odmah nemaju električne energije.Takođe, tražim da se i ostavi rezervna varijanta, a to je priključenje na elektro mrežu Općine Gračanica“.

Devedžić Almedin:

„Ja imam dvije inicijative i obje su upućene Općinskom načelniku. Pozivam Općinskog načelnika da u skladu sa važećim propisima, pomogne mještanima MZ Lukavica.

Kruškić Ragibu rješavanje problema plaćanja naknade pretvorbe poljoprivrednog zemljišta u građevinsko, s ciljem dobivanja građevinske dozvole.

Obrazloženje: Obzirom da je Kruškić Ragib u majskim klizištima ostao bez doma, istom je donacijom napravljena kuća na novokupljenom zemljištu za čiju pretvorbu iz poljoprivrednog a građevinsko zemljište.

Mi smo, ja mislim, imali jedan zaključak da se tim ljudima maksimalno pomogne i izađe u susret, pa bih molio načelnika da se i ovom čovjeku pomogne.On je uputio zahtjev u vezi s tim.

Druga inicijativa je takođe upućena načelniku i nadam se da je u toku realizacija, a odnosi se na naše sugrađane.Ja sam direktno obaviješten da će oni danas doći.Drago mi je što su oni danas sa nama i nadam se da su pregrmili najgore teškoće obzirom da su oni ljudi koji su ostali bez svojih domova. Posebno ih selamim i nadam se da će danas iz ove sale izaći zadovoljni.U pitanju je put, pristupni put za zemljište koje su dobili za izgradnju novih kuća.Ja nisam stigao da obavijestim sve pojedinačno, a vezano za ekipu iz Opštine, bila je na terenu prošle sedmice i snimili teren.Nadam se da će vrlo brzo krenuti u izgradnju pomenutog puta, kao i sve aktivnosti oko gradnje jer on ide preko školskog zemljišta i sada u kakvom je stanju, nemože poslužiti adekvatno.Nadam se da će se brzo krenuti u realizaciju toga kako bi smo pomogli našim sugrađanima“.

Krajinović Nihad:

„Ja dajem inicijativu za izradu registra imovine jedinice lokalne samouprave.S ciljem sagledavanja stvarnog stanja imovine i sredstava jedinice lokalne samouprave radi kvalitetnijeg upravljanja time i doprinosa koje će lokalna zajednica ostvariti predlažem pokretanje osnivanja „Registra imovine lokalne samouprave“. Svjestan šta je u prethodnom periodu privatizacija učinila društvenoj imovini i straha od gubitka onoga što još pripada društvu tj. zajednici nemam dileme da se objedini na jedno mjesto šta to sve pripada, odnosno ono čime se raspolaže.Opravdanost se ogleda i u upotrebi neiskorištenog koje može biti u funkciji od višestrukog značaja kako za zajednicu tako i za budžetske prihode.Ovime se stimulišu eventualne investicije i ulaganja.Uvođenje racionalnog, transparentnog i ekonomski orijentisanog upravljanja imovinom, doprinosi povećanju sigurnosti i povjerenja u lokalne strukture u ulozi upravitelja javnom imovinom.Samo ću dodati i to da imam saznanje kako neke općine F BiH imaju već pozitivna iskustva“.

Gazibegović Admir:

„Ja imam jedno vijećničko pitanje. Pitanje upućujem Općinskom načelniku. Dokle je došla procedura oko javnog poziva za raspodjelu novčanih sredstava građanima koji su pretrpjeli štete na svojim objektima od grada u Mjesnoj zajednici Donja Orahovica?

Obrazloženje: Na sastanku sa Udruženjem penzionera u MZ Donja Orahovica isti su me zamolili da postavim pitanje u vezi raspodjele novčanih sredstava po javnom pozivu pošto je istekao rok od 60 dana za rješavanje ovog pitanja“.

Avdić Himzo:

„Imam jednu inicijativu koju upućujem Službi za poduzetništvo i lokalni razvoj. Pokrećem inicijativu da se na području općine Gračanica formira i organizuje stočna pijaca.

Obrazloženje: Naša općina posjeduje veliki stočni fond što je za pohvalu. Osim toga jedna smo od općina sa velikim brojem stanovnika i poljoprivrednim dobrom što se smatra da treba da imamo stočnu pijacu, a obzirom da je ona i prije bila ne vidim razlog zašto je i danas nebi imali. Ovo je inicijativa i velikog broja građana i farmera koji posjeduju stoku“.

Hadžić Ezaneta:

„Ja bih nešto rekla vezano za odgovor koji mi je upućen od strane JP „Ceste Federacije BiH“ na prošloj sjednici sam tražila da se u naselju Stjepan Polje na dio oko puta postavi vertikalna i horizontalna signalizacija radi sigurnijeg prelaska djece. Sad ću vam pročitati dio teksta odnosno odgovora.

Citiram: Oprema na cestama se postavlja na osnovu saobraćajnog projekta Zakonom o cestama F BiH. Na osnovu navedene projektne dokumentacije izvršeno je postavljanje saobraćajne signalizacije i opreme ceste, tako da je na ovoj lokaciji vidno obilježen pješački prelaz. To je tačno znači u naselju Stjepan Polje je vidno postavljen pješački prelaz. Eh ja pitam ovu gospodu koja mi je poslala odgovor. Zar oni smatraju da bi mi ponovo tražili nešto što je već sigurno za građane i djecu Stjepan Polja. Dalje čitam. Kada se stvore potrebni preduvjeti obnovit će se horizontalna signalizacija i postaviti posebni objekti na cesti za „umirenje saobraćaja“ koji su to potrebni preduvjeti? I to ih pitam. Da neko možda strada na cesti? Pitala bih još koji su to preduvjeti koji su ispunjeni u Lohinji i npr. ostalim naseljima koji imaju horizontalnu i vertikalnu signalizaciju? Šta su oni ispred nas? Ispred djece Stjepan Polja. Zatim kaže, napominjemo da smo uz cestu M4 u cilju zaštite pješaka u naselju Stjepan Polje izgradili trotoar. Kakve veze ima trotoar sa signalizacijom? Nemaju nikakve. Znači ovo je dio puta koji treba obilježiti vertikalnom i horizontalnom signalizacijom, jer je to mjesto visoke frekvencije djece. Molila bih da oni meni odgovore na ovo moje pitanje, koji su to preduvjeti, šta treba da se desi pa da mi to u Stjepan Polju dobijemo?“

Sead Gazibegović:

„Moja inicijativa se odnosi na mostove, kod klaonice i na raskrsnici kod Doma zdravlja. Naime, prilikom ovogodišnjih poplava zaštitne ograde na tim mostovima su potpuno uništene i korištenje istih predstavlja opasnost za sve one koji ih koriste. Pogotovo je kritično ovo kod Doma zdravlja, jer to više i nije most. To je malo šire brvno, doduše metalno, nije drveno i vjerovatno je pitanje samo dana kad će se neko naći u rijeci Sokoluši jer je već sad led na tome. Kod klaonice se ograda može postaviti, most nije stradao. Eventualno obrazloženje da će most kod Doma zdravlja ići, stoji, ali da se onda ostaci tog mosta sklone ili da se napravi ograda da neko ne strada“.

Edin Ibrišević:

„Ja imam dvije inicijative. Pridružujem se inicijativi kolegice Ezanete. Moja prva inicijativa je na istu temu, takođe revoltiran odgovorom kojeg je ona dobila pa sam se i ja uključio da iniciram slično.

Inicijativu upućujem prema Direkciji za ceste F BiH da na magistralnom putu Doboj-Tuzla u naselju Stjepan Polje postavi saobraćajni znak „Škola u blizini“.

Obrazloženje: Neposredna blizina škole i veliki protok učenika u terminima početka nastave zahtijeva hitno postavljanje znaka kako nebi došlo do saobraćajnih nesreća, opasnih po živote djece koja žive tu“.

Drugu inicijativu upućujem prema Policijskoj upravi Gračanica. Da pod hitno izvrši reviziju posjedovanja lovačkog naoružanja u saradnji sa Lovачkim društvom „Srndać“ Gračanica.

Obrazloženje: S obzirom da je određenom broju lovaca prestao status lovaca, a određeni broj je preminuo, neophodno je da u narednom periodu u skladu sa zakonom svo „slobodno“ naoružanje se izuzme i prema zakonu odloži na mjesto predviđeno za to“.

Hasan Puškar:

„Ja imam jedno vijećničko pitanje, a ono može biti i inicijativa. Ko je nadležan za čišćenje parking mjesta u gradu? Znači ulica 22. Divizije, Kej i druge. Ali evo čim je prvi snijeg a ta parking mjesta niko ne čisti, tako da je onemogućeno parkiranje. Moja inicijativa je da se to naloži „Komusu“ dok se pravno ne riješi čija je to nadležnost. Znači, u slučaju većih padavina da se sva parking mjesta očiste, a to se može raditi samo tokom noći. I prošle godine sam ja isto skretao pažnju na ovo“.

Čamdžić Mirsad:

„Ja bih želio samo da prokomentarišem ovu izjavu kolege Rahima Gadžića. O čemu se radi? Vidim da zaista iz istupanja vijećnika SDA, zaista vidim jednu drugu vrstu prilično privržene i personalne inspiracije za djelovanje i predstavljaju pitanje koje ide personalno a predstavljaju se kao pitanja opšteg značaja.

Prvo pitanje sam apsorbirao, a drugo pitanje ide kao jedan klizeći stav Edinu Ibriševiću. Imamo problem kao, a govorim ovdje o Našoj stranci. LDP je imao najveći problem u Srbiji kada je Aleksandar Vučić i radikali preuzeo njegov program. I tada su ga pregazili. Pošto je ovo velika stranka, velikog kapaciteta SDA, nama je drago da utičemo na društvene procese i nisu nam potrebni politički poeni. Drago da Rahim iskazuje jednu veliku civilizacijsku političku vrijednost a to je deprofesionalnost mjesta predsjedavajućeg Općinskog vijeća. Međutim, 08.11.2012. godine poslali smo u SDA, Naša stranka, platformu OO Naše stranke Gračanica za razgovor o parlamentarnoj većini. I u toj platformi smo tražili dvije tačke, deprofesionalizacija mjesta predsjedavajućeg Općinskog vijeća i smanjenje vijećničkih paušala za 50%. Nikad niste odgovorili, a imali ste priliku. I podsjećam, parlamentarna većina koja bezuvjetno podrži nešto dobit će podršku Naše stranke. Tada to nije podrška ni SDA ni SDP. Izabrali ste predsjedavajućeg i sasvim je uredu. I mi smo to poštovali i poštujemo rad ovog civilnog doma. Međutim, kolega Gadžiću, samo radi aktuelnosti, radi tzv. zaštite autorskih prava, prije dvije godine za ovom istom govornicom na konstituirajućoj sjednici Općinskog vijeća Gračanica, tu ideju ste hladno skinuli s krila. Drago mi je da ste sada došli na to, ali da samo u ovu vašu inicijativu ubacimo i smanjenje vijećničkih paušala za 50% kako bi ona zadržala svoju autentičnost i kako bi dobra bila. odlična inicijativa, podržavam, znam sve procese i želim da tako i ostane“.

Rahim Gadžić:

„Nama je drago što si se Mirso javio. Evo prilike sada da ovo uradimo i podržat ćemo, a ti znaš kad je riječ o vijećničkim paušalima, općinski vijećnici u Gračanici imaju najmanje paušale i evo Klub SDA je zato da se potpuno ukinu. Nama ne trebaju paušali. Mi hoćemo da radimo u interesu građana i ako vi smatrate a i ako građani smatraju da vijećnici trebaju džaba da rade, nije nikakav problem, ali samo češ tada i ti Mirso morati putovati u Prijeko Brdo i nazad kao i ja što to radim i morat češ šetati malo više. zamolio bih te da u ime direktora JU BKC-a ne odgovaraš ti kad je u pitanju treća faza BKC-a, nego da to treba uraditi direktor.

Pitanje je bilo upućeno direktoru BKC-a a ne Mirsadu Čamdžiću. Slažem se sa komentaram inicijative i evo mi tražimo da se Vijeće izjasni o ovoj inicijativi i da na januarskoj sjednici donesemo odluku. A ako treba i paušale, mi ćemo podržati“.

Za riječ se javio Tursunović Esad, iako je predsjedavajući Vijeća naglasio da nije uobičajeno raspravljati o predloženim inicijativama.

Tursunović Esad:

„Ja ću samo u svoje lično ime, niti u ime SDA, niti u ime Mirsada Čamdžića i ostalih. Svi vi i Mirso, od podne ovako do podne onako. Niko nema petlje za radikalne poteze tih što su podnijeli zahtjev. Neki dan sam čitao sedam mušketira, pa da se nadovežem na sve, za dvoranu i slično. Lijepa je to stvar, ali mi u Gračanici imamo tri rane. Hajde više da rješavamo slučajeve. Idemo etapu po etapu, a čim se dotaknemo politike, hoću li na sledećim izborima imati dovoljan broj glasova, hoću li imati popularnost, stane se. Ako iko dobije dinar kakav stane se. Svi bi nešto radili, upakovali lijepim riječima. Treba izaći i prostim riječima reći u ovom je problem, u ovom je problem itd., a ne samo zapetljivati ovdje“.

Puškar Hasan:

„Prvo primjedba. Predsjedavajući na vijećnička pitanja i inicijative, odgovaraju oni kome su postavljeni. Vi niste trebali nama nikome dozvoliti da mi izađemo i diskutujemo. Sad će se ova polemika vršiti u nedogled, a vidite koji narod čeka da čuje pametnije stvari od ovih naših prepucavanja.

Druga stvar. Na toj istoj sjednici kad je bila ta priča o paušalu ja sam predlagao da bude „nula“ i nije niko podržao. Ima u zapisniku i nemojte da pričamo o paušalima. Paušal bio, ne bio, de da nas trideset radimo. Znači zamolio bih da se radi, a zna se kako ide procedura pitanja i inicijative u skladu sa Statutom i Poslovníkom“.

Odgovore na neka pitanja dao je Općinski načelnik Nusret Helić:

„Da dam neke odgovore na inicijative zbog ljudi koji sjede ovdje, da bude jasnije. Evo Mušić je postavio pitanje i došlo je zvanično, prijedlog od grupe privrednika vezano za regulaciju dijela Spreče zbog poplava i problema koji su prisutni. Na našu inicijativu je i došlo do izrade projektne dokumentacije za regulaciju Spreče od Lukavca do Doboja. Posebno su istaknuti problemi, ušće Sokoluše u Spreču. Za taj dio, zatim dole Pribava prema Sočkovcu, jedan dio u Orahovici i radi se na tome. Dakle, mi smo i tražili, projekat se radi i u ovoj i sledećoj godini su nam iz JP obećali da će biti dio sredstava u planu za regulaciju dijela Spreče kad je u pitanju industrijska zona. Kad je u pitanju ovo za Lukavicu, Kruškić Ragib, tačno je da je zahtjev podnesen i naknada je tačno po zakonu i načelnik će u skladu sa svojim nadležnostima reagovati. Logično je da ovaj čovjek zbog ovakve situacije kakva je bude oslobođen ili na nekakav drugi način riješen, uglavnom da on ne plati tu naknadu.

Kad je u pitanju put u Lukavici, tačno je da su izlazili, tačno je da je prije dva dana dobio nalog izvođač i oni su snimali teren ali ovakvo je vrijeme. Ide se na ucjevljenje potoka sa cijevima preko metar obzirom na veličinu i put će se odmah prosjeći čim dozvole uslovi. Postavit će se i dio kanalizacione i vodovodne cijevi da bi se sutra kod priključaka eventualno moglo reagovati. Bilo je i pismeno od građana Lukavice prema načelniku vezano za podjelu ovih sredstava za kuće. Za sedam kuća, za koje je raspisan konkurs, znate da je pravila utvrdio državni fond i tamo su data sredstva za sedam objekata, po kriterijima, po tridesetpet hiljada i nešto maraka. Mi smo raspisali konkurs, evo liste će biti. I ja bih možda da sam ja utvrđivao pravila, tako reagovao, da se to nekako podijeli na više, pa da svi oni koji su dobili placeve, dobiju jedan dio para. Ja sam sutra u fondu, pokušat ću da vidim ima li kakvih šansi.

Ono što mi imamo para, a sjećate se da smo vam dijelili po dvije-tri hiljade, mi smo tako išli da ljudi krenu. I ovo što ćemo danas u budžetu usvojiti, tražit ćemo da na taj način mi svoja sredstva upućujemo prema onima kojima je potrebno. Ali onaj ko je rekao da je to tačno za kuću, to valja tako potrošiti dok on ne izmijeni pravila. To sam rekao, da nebi bilo pitanja. Bit će liste, bit će žalbe, ali to valja sprovesti po pravilima kako su nam dali donatori. Imamo obećanja da UNDP ulazi u Gračanicu. Kad kažem ulazi, bili su u Tuzli, a sad je Gračanica navodno došla na red i da će oni također obilaziti teren. Direktno oni, neko preko Opštine, možda uz našu saglasnost će određivati tačno donatori. Ni dinara još donatorskih sredstava da znate nije leglo ni u jednu vladu. Ovo sve što se dijelilo, to su sredstva iz vlada, fondova, rezervi itd. Nihad Krajinović je postavio dobru inicijativu, a ja ću samo napomenuti da ako ste dobro pročitali Program rada načelnika, stoji tamo da se slijedeće godine ulazi u pripremu ovih registara, snimanje i to je veoma značajan projekat. I sa stanovišta da sve ono što nije javno dobro i što ne služi javnom dobru, da to prodamo i uložimo u neke kapitalne projekte. Ima toga, to su one uzurpacije i puno toga. Ovo iz Orahovice, završen je postupak. Tamo je konkurisalo preko šesto ljudi. Mi imamo oko stosedamdeset i nešto hiljada, ja sam pokušao i uradit ćemo, ne čekajući rokove za žalbu. Podijelit ćemo ta sredstva, do srijede, spram broja oštećenih crijevova. Imaju tamo kriteriji. I na račune će leći, a svi ste dostavili brojeve računa, spram kriterija će biti i iznos para. Maksimalno se može dodijeliti za do 1.500 uništenih crepova, a sve preko ne. I da vam kažem da je prema tim kriterijima za jedan crijep 0,30 feninga odnosno 30,00 feninga. To je pomoć i bit će podijeljeno do nove godine. Evo ovo što je sead kandidovao u pravu je oko ovih ograda. Mi imamo donatora za most, koji će se praviti tamo prema Vatrogasnom, pa je možda i to bio jedan od razloga što nismo. Ali valja reagovati interventno, pa valja postaviti ove ograde da se nebi dešavale nezgode. Ove druge inicijative koje su kandidovane, razmotrit ćemo i dobit ćete odgovore u pismenoj formi“.

Sead Gazibegović u funkciji direktora Elektroposlovnice Gračanica je dao odgovor na inicijativu koju je kandidovao Selimović Senad:

„Nema potrebe za upućivanje inicijative da se tu nešto radi, zato što su aktivnosti već započele. Dalekovod je isprojektovan, imovinsko pravni odnosi na području općine Gračanica su riješeni. Ostalo je da se riješi ono što pripada Opštini Gračanica i ide se kasnije na građevinsku dozvolu i u realizaciju projekta. Već se duže vrijeme, dakle radi na tome“.

Prešlo se na raspravu o predloženom dnevnom redu 26. sjednice Općinskog vijeća Gračanica.

Predsjedavajući Općinskog vijeća Gračanica Edin Ibrišević je pročitao dnevni red koji glasi:

1. Budžet Općine Gračanica za 2015. godinu
2. Odluka o izvršavanju Budžeta Općine Gračanica za 2015. godinu
3. Odluka o raspodjeli sredstava iz Budžeta Općine Gračanica namijenjenih za finansiranje političkih stranaka, nezavisnih samostalnih vijećnika organiziranih u parlamentarne grupe-klubove vijećnika u Općinskom vijeću Gračanica
4. Odluka o provođenju Prostornog plana Općine Gračanica 2006.-2026. godina.
5. Odluka o pristupanju Općine Gračanica u članstvo Lokalne akcione grupe (LAG) regije Doboj.



6. Plan sanacije gradskog građevinskog zemljišta.
7. Program rada Općinskog vijeća za 2015.godinu.
8. Programske aktivnosti Općinskog načelnika za 2015.godinu.
9. Informacija o stanju zaštite građana od neeksplozivnih i minsko eksplozivnih sredstava na području općine Gračanica u 2014.godini.

Za diskusiju se javio Gadžić Rahim:

„Ja u ime Kluba vijećnika SDA tražim pauzu u trajanju od deset minuta u vezi sa usaglašavanjem Kluba“.

Data je pauza u trajanju od 10 minuta. Nakon pauze nije bilo više učesnika u diskusiji o predloženom dnevnom redu i isti je usvojen jednoglasno.

#### TAČKA 1

##### Budžet Općine Gračanica za 2015. godinu

Uvodno obrazloženje je dao Općinski načelnik Nusret Helić:

„Poštovani predsjedavajući, radno predsjedništvo, gosti i mediji, ja vas skupa pozdravljam i želim uspješan rad na današnjoj sjednici Općinskog vijeća na kojoj utvrđujemo Budžet i svoja programska opredjeljenja u 2015.godini.

Prvi od ključnih dokumenata koji je osnova svih naših aktivnosti i politike za narednu godinu je Budžet Općine.

Ja vjerujem, da ćemo ga kao i do sada biti objektivni i odgovorni i utvrditi Budžet koji će biti realan i provodiv i time potvrditi da smo odgovorna vlast.

Prijedlog Budžeta ste dobili uz poziv za današnju sjednicu. Podsjetit ću na slijed radnji koje su nas dovele do prijedloga Budžeta.

U skladu sa Zakonom o budžetima u Federaciji BiH, smjernicama i ciljevima fiskalne politike Ministarstva finansija TK, procjene ostvarenja prihoda i izdataka do kraja 2014.godine, zahtjeva korisnika, naših procjena prihoda za 2015.godinu, te strateških dokumenata i politike razvoja za 2015.godinu utvrdili smo Nacrt budžeta koji ste razmatrali i usvojili u oktobru mjesecu.

Prema Nacrtu budžet je planiran u iznosu od 9.284.000 KM, uz napomenu da njime nisu planirani grantovi viših nivoa vlasti, niti su planirana sredstva i projekti koji neće biti realizovani u toku ove godine i kao i neke koje treba prenijeti u budžet 2015.godine.

Zaključkom Vijeća utvrđeno je da se o Nacrtu Budžeta obavi javna rasprava u periodu do 05. decembra.

U toku javne rasprave koja je obavljena u gotovo svim mjesnim zajednicama i zainteresovanim subjektima uz napomenu da je Nacrt objavljen i na općinskoj web stranici, oglasnoj tabli Općine i gradu, a i upućen opći poziv građanima da daju svoje prijedloge, stiglo je puno primjedbi, prijedloga i zahtjeva u kojima se tražila preraspodjela prihoda, novi projekti i slično.

U odnosu na Nacrt, tražilo se preko 3 miliona KM novih sredstava za razne namjene i projekte nevedeći računa o ograničenim sredstvima i mogućnostima.

Evo nekih od zahtjeva:

-Sindikalni odbor Općine tražio je da se sredstva za plaće povećaju za 300.000 KM da bi se izvršilo usklađivanje sa Zakonom o plaćama,

-LDS traži novih 155.000 KM za infrastrukturu, službe Općine 100.000 KM za zimsku službu, regulacione planove, matične knjige i slično, Dječije obdanište da se povećaju sredstva za plaće i drugo za 75.000 KM, MZ Gornja Orahovica 35.000 KM, MZ Miričina 70.000 KM za puteve, vodovode i slično, MZ Pribava 100.000 KM, MZ Piskavica 360.000, MZ Škahovica 65.000, MZ Doborovci 155.000 KM, MZ Džakule 165.000 KM, MZ Prijeko Brdo 90.000 KM, Gornja Lohinja 125.000 KM, MZ Buk 80.000 KM, MZ Stjepan Polje 175.000, MZ Doborovci 150.000, MZ Lendići 170.000 KM, MZ Vranovići 60.000, MZ Trnovci 70.000, MZ Lukavica 155.000, MZ Gračanica 400.000, MZ Babići 150.000, MZ Soko 50.000, Mujić Mejra za projekte u Donjoj Orahovici 70.000 KM. Rekoh sve nešto preko tri miliona maraka.

Nakon razmatranja prispjelih primjedbi i prijedloga Općinski načelnik je održao sastanke i sa klubovima vijećnika i parlamentarne većine i SDA, na kojima se razgovaralo i dogovaralo o primjedbama koje se mogu prihvatiti i realnom kreiranju budžeta.

U skladu sa tim i nakon dodatnih analiza i procjena o ostvarenju budžeta za ovu godinu, novih smjernica fiskalne politike utvrđen je prijedlog budžeta koji je danas pred vama. Budžet za 2015. godinu planiran je u iznosu od 11.294.500 KM, što je za 2.010.500 KM više u odnosu na Nacr. Povećani su porezni prihodi za 135.147 KM, neporezni za 113.000 KM, grantovi-potpore za 334.000 KM, primitci za 810.000 KM od čega je iz kredita planirano 770.000 KM i 618.353 KM očekivani suficit iz ranijeg perioda.

Za toliko su povećani i rashodi, te je Budžet uravnotežen.

Iz dostavljenog prijedloga Budžeta, vidjeli ste koji su izdaci smanjeni, koji povećani, a koji su to novi projekti.

Oni su rezultat prije svega prihvaćenih primjedbi i prijedloga sa javnih rasprava i dogovora sa klubovima vijećnika, prenesenih projekata iz sredstava koja se neće realizovati u 2014. godini, kao što su: protugradna zaštita, sredstva fonda za porušene kuće, namjenska sredstva za put Šenik, vodovod Lukavica i drugi, te novih projekata iz kreditnog zaduženja (sportska sala, javna rasvjeta, elementarne nepogode i drugo).

Valja izdvojiti nekoliko projekata oko kojih su se svi klubovi složili i koji bi se trebali naći u Budžetu 2015. godine.

To su projekti: otklanjanje posljedica elementarnih nepogoda, sanacija klizišta i gradnja stambenih objekata, sportska sala, javna rasvjeta u centru grada i parkovima i drugo.

Obzirom da su prihvaćene mnoge primjedbe sa javnih rasprava i uvrštene u Budžet, a da nema dovoljno izvornih ili sopstvenih prihoda ovi projekti o kojima sam govorio i još neki drugi našli su mjesto u budžetu i finansirat će se iz kreditnog zaduženja Općine Gračanica (Općina nije zadužena i ima zakonskog osnova i prostora za zaduženje).

Još neke napomene i pojašnjenja.

Kako se općine mogu zaduživati samo za kapitalne projekte, a gradnja porušenih kuća za građane kojima su objekti stradali u elementarnoj nesreći nije kapitalni projekat, to smo morali za te namjene obezbijediti vlastita sredstva i iz redovnih prihoda, a zadužiti se za neke kapitalne projekte kao što je zgrada Općine, potisni cjevovod Babići-Malešići, izrada glavnih projekata i geološko-hidroloških radova i još neke druge.

To praktično znači da bi se prema prijedlogu budžeta iz kredita u iznosu od 770.000 KM finansirali sledeći projekti:

- sportska sala 250.000 KM,
- elementarne nepogode i klizišta 150.000 KM,
- javna rasvjeta u centru grada i parkovima 100.000 KM,
- zgrada Općine 100.000 KM,
- potisni cjevovod Babići-Malešići 100.000 KM,
- izrada projekata geoloških i hidrogeoloških radova 70.000 KM.

Na prijedlog budžeta koji vam je dostavljen stigli su amandmani u propisanom roku, te mi dozvolite da se u svojstvu predlagača Budžeta izjasnim o njima:

Amandman I

Vijećnik SDP-a Osmić Mirsada podnijela je amandman u kome se traži da se poveća budžetska stavka – Kulturno umjetnička društva za 3.000 KM. Amandman se usvaja.

Amandman II

Vijećnik SDP-a Ahmetašević Jasmina podnijela je amandman u kome traži da se planira 15.000 KM za asfaltiranje puta Mujkanovac-Meraje – Donja Lohinja. To je put koji veže Lohinju i Pribavu. Obzirom da je jedna dionica tog puta završena. Amandman se usvaja.

Klub vijećnika SDA je podnio 8 amandmana i to:

Amandman I

Da se u Budžetu u okviru sredstava BKC-a i granta od 275.000 KM obezbijedi 15.000 KM za konačno rješenje Zavičajne zbirke.

Amandman se usvaja u smislu da će se u narednoj godini riješiti status Zavičajne zbirke u okviru BKC-a i uz pomoć Općine.

Amandman II

Da se poveća stavka Rekonstrukcija puta Gornji Doborovci-Džanani-Serhatlije za 15.000 KM.

Amandman se djelimično usvaja i planira dodatnih 5.000 KM za ovaj put, uz napomenu da je ovaj put uvršten u prijedlog budžeta sa 15.000 KM, a nije ga bilo u nacrtu.

Amandman III

Da se povećaju sredstva za sportsku salu za 150.000 KM, na taj način što bi se preusmjerila sa stavke utopljanje sportske sale „Luke“ 150.000 KM.

Amandman se odbija, jer su sredstva za utopljanje sportske sale namjenska iz Kantona za projekat energetske efikasnosti i upravo za utopljanje sportske sale „Luke“. Procedure su već raspisane i isključivo su za te namjene.

Amandman IV

Da se u Budžetu predviti stavka od 5.000 KM za rekonstrukciju poligona u Piskavici.

Amandman se odbija, a pitanje potrebe rekonstrukcije poligona ćemo rješavati na drugi način.

Amandman V

Da se poveća stavka vodovod Vranovići za 10.000 KM.

Amandman se odbija jer smo u odnosu na Nacrt budžeta u prijedlogu povećali sredstva za Vranoviće za 10.000 KM.

Amandman VI

Da se poveća stavka za put Panđurište u Doborovcima za 10.000 KM.

Amandman se odbija, jer smo u odnosu na Nacrt u prijedlogu Budžeta već ovu stavku povećali za 10.000 KM, tako da je za ovaj put planirano 30.000 KM.

Amandman VII

Da se za puteve u Prijekom Brdu planira 20.000 KM.

Amandman se djelimično prihvata i planira 15.000 KM i sa onih 20.000 se za Prijeko Brdo planira 35.000 i ima opravdanje, jer nedaj bože može doći do prekida sa Monja, pa neka ima alternativni put.

Amandman VIII

Da se za vodosnabdijevanje u MZ Trnovci planira još 5.000 KM.

Amandman se prihvaća, jer planiranih 5.000 KM u prijedlogu budžeta je malo za bilo koji zahvat vodosnabdijevanja, tako da je sa ovih 5.000, za Trnovce planirano 10.000 da se može jedan dio vodovoda završiti.

Komisija za propise i statut, izbor i imenovanja, općinska i druga priznanja i obilježavanje značajnih događaja i ličnosti podnijela je 2 amandmana i to:

Amandman I

Da se planiranih 5.000 KM za kanalizaciju u MZ Miričina preusmjeri za izgradnju spomen-obilježja kako bi se isto moglo završiti i spriječilo dalje propadanje obzirom da je započeto. Amandman se usvaja.

Amandman II

Da se stavka u Budžetu za bušenje bunara u Miričini poveća za 15.000 KM.

Amandman se djelimično usvaja i planira novih 10.000 KM, jer je u odnosu na Nacrt u prijedlogu budžeta ova stavka već povećana za 5.000 KM.

I ja predlažem 3 amandmana:

Amandman I

Da se planira 20.000 KM za potrebe dijalize u Domu zdravlja Gračanica. Ako se sjećate u budžetu je već stavka 20.000 za bolnicu.

Amandman II

Da se poveća stavka za volontere za 10.000 KM, obzirom na Odluku Vijeća da načelnik može prema potrebama povećati broj volontera, pa da obezbijedimo sredstva.

Amandman III

Da se za 2.000 KM poveća stavka za realizaciju projekta MDGF-Socijalna zaštita i inkluzija. Tamo je bilo planirano već 3.000, sa ove 2.000 to bi već nešto značilo za te kategorije.

Vrijednost prihvaćenih amandmana iznosi 85.000 KM, a sredstva bi se obezbijedila na taj način što bi se dodatno zadužili za 80.000 KM i brisali stavku – kanalizacija Mehmedovići u Džakulama od 5.000 KM, jer je za taj projekat u iznosu od 17.000 KM potpisan ugovor sa Kantonom i čim ta sredstva legnu na račun Općine bit će uvršten u budžet Odlukom načelnika.

Obzirom da se, kao što sam naveo, može zaduživati za kapitalne projekte dodatnih 80.000 KM zaduženja bi se odnosilo na puteve u Prijekom Brdu 35.000 KM i Pribava 45.000 KM. U Odluci za februar će pisati sve šta se finansira iz zaduženja, a vi ćete Odluku dobiti na razmatranje.

U skladu sa usvojenim amandmanima, predlažem Budžet u iznosu od 11.374.500 KM, od čega su:

- prenesena sredstva 618.353 KM,
- prihodi i primitci 10.756.147 KM,
- rashodi i izdaci 10.846.500 KM,
- finansiranje 528.000 KM-servisiranje duga.

O tome na koji period ćemo se zadužiti za 850.000 KM, predložit ćemo Vijeću Odluku u januaru ili februaru. Hvala“.

Učesnici u diskusiji su:

Šnobl Zvonimir predsjednik Komisije za budžet:

„Komisija za budžet na svojoj petoj sjednici razmatrala je prijedlog budžeta za 2015. godinu i podržala je budžet, te daje preporuku Vijeću da usvoji Budžet Općine za 2015. godinu onako kako je i predložen od strane predlagača Općinskog načelnika“.

Tursunović Esad:

„Prije nego što krenemo u raspravu o budžetu, htio bih da samo jednu stvar ovdje razriješimo sa načelnikom, sa službom, sa vijećnicima i ostalim.

Imamo ovdje delegaciju iz Lukavice koju treba urgentno riješiti. Volio bih da izađe Almedin i načelnik i prije rasprave, da probamo naći rješenje za ovih dvanaest porodica. Imamo izbjeglice u vlastitom selu. Sedam, osam mjeseci nije se ništa dešavalo za njih. Konkretno njihov problem, ne znam. Ne znam šta ih muči ali od jedanaest miliona i nešto možemo izdvojiti sredstva koja nisu prioritet. Znači možemo od poligona, od sporta, od puteva itd. i da prekinemo više agoniju. Molim vas, prije svega da izađemo i da to raščistimo. Druga stvar, načelniku bih sugerisao, vezano za Dom zdravlja 20.000,00 KM. Treba provjeriti finansijsku karticu u Domu zdravlja, odnosno Upravni odbor da donese ili već menadžment. Ja kako znam Dom zdravlja ima oročenih para. Ima preko dva miliona oročenih para, i njima ne treba pomoć“.

Krajinović Nihad:

„Obzirom da smo prošli ovaj period od nacрта do prijedloga budžeta i vrijeme za ulaganje amandmana, razumijevajući sveopću situaciju u kojoj se nalazi i Općina i njeno finansijsko stanje, uprkos tzv. investicijskim željama, Klub vijećnika SDP-a prihvatit će predloženi budžet. Moram reći da su naši vijećnici Kluba imali veliki broj amandmana koje smo reducirali, kako zbog finansijskog okvira, tako i radi realnih eventualnih amandmana kolega vijećnika drugih stranaka. Poštovat ćemo prijedloge koji budu iznešeni, predloženi, a one koji budu u korist društvene zajednice i prihvatiti“.

Gadžić Rahim:

„Evo vidimo načelnik je obrazložio sve amandmane koji su uloženi na budžet Općine Gračanica. A ja se izvinjavam ovim ljudima koji su prisutni, ipak moram uzeti pauzu od dvije-tri minute da Klub vijećnika zauzme stav. Načelnik je većinu amandmana prihvatio, ali ja sam kao predsjednik ne mogu odlučiti, pa neka bude pauza kako bi se mogli izjasniti“.

Data je pauza u trajanju od pet minuta.

Nakon pauze, Rahim Gadžić u ime Kluba SDA iznio je slijedeće:

„Klub vijećnika SDA, nakon obavljenih konsultacija i vidimo da je načelnik veći dio amandmana Kluba SDA prihvatio, a jedino smo imali nedoumicu na izgradnji sportske dvorane u iznosu od 25.000,00 KM, mi smo htjeli da preciziramo kuda idu ta sredstva, međutim to će ostati otvoreno, a Općinsko vijeće će se u narednom periodu izjasniti, kud ta sredstva da se usmjere i Klub SDA će podržati budžet“.

Budžet Općine Gračanica za 2015. godinu uz sve prihvaćene amandmane od strane predlagača, usvojen je jednoglasno sa 28 glasova „ZA“. Odsutni su bili Tursunović Esad i Devedžić Almedin.

## TAČKA 2

Odluka o izvršavanju Budžeta Općine Gračanica za 2015. godinu

Šnobl Zvonimir, kao predsjednik Komisije za budžet iznio je stav:

„Komisija za budžet Općine Gračanica je na svojoj petoj sjednici razmatrala Odluku o izvršavanju budžeta Općine Gračanica za 2015. godinu i predlaže Vijeću da istu usvoji u predloženom tekstu“.

Odluka je usvojena jednoglasno.

### TAČKA 3

Odluka o raspodjeli sredstava iz Budžeta Općine Gračanica namijenjenih za finansiranje političkih stranaka, nezavisnih samostalnih vijećnika organiziranih u parlamentarne grupe-klubove vijećnika u Općinskom vijeću Gračanica

Nije bilo učesnika u diskusiji i Odluka je usvojena jednoglasno.

### TAČKA 4

Odluka o provođenju Prostornog plana Općine Gračanica 2006.-2026.godina.

Uvodno obrazloženje uz elektronsku prezentaciju grafičkog dijela dala je Aida Hodžić, šef Službe za urbanizam:

„Dakle, danas imamo na sjednici Općinskog vijeća Odluku o usvajanju i provođenju Prostornog plana Gračanica 2006.-2026.godina. Mislim da je veći dio ovdje prisutnih upoznat sa ovim planskim aktom. Odnosno radi se o jednom veoma važnom i obimnom strateškom dokumentu kojeg je Općinsko vijeće Gračanica usvojilo 2003.godine, na sjednici u mjesecu decembru, kako je to i napisano u obrazloženju kojeg ste dobili u materijalima. Tad je usvojen Prostorni plan Gračanica sa dva zaključka, odnosno dvije stavke. Prva od stavki je bila da se u naselju Stjepan Polje, Donja Orahovica i Donja Lohinja udovolji zahtjevu MZ za proširenje urbanih područja u predloženim granicama uz obavezu izrade regulacionih planova za ta područja. Usvojeni Prostorni plan otišao je na doradu nosiocu izrade plana. To je bio Institut za urbanizam i arhitekturu Arhitektonskog fakulteta u Sarajevu i krajem 2005.godine je došao korigovan i popravljen, poslije čega smo mi odmah tražili saglasnost Ministarstva prostornog uređenja i zaštite okolice TK na plan da bi mogao krenuti na primjenu. Od tada kreću problemi o korištenju tog plana, odnosno ta saglasnost je dobivena tek u oktobru ove godine. Šta su bili razlozi? Kao što ste pročitali u obrazloženju prvo se čekalo da se usvoji Prostorni plan TK, koji je usvojen 2006.godine. Zatim, nakon toga, moralo se izvršiti usaglašavanje sa novom zakonskom regulativom. To je značilo da se plan morao uraditi u digitalnoj formi. Prije toga je bila zakonska odredba izrade plana samo u analognoj formi. Digitalna forma u GIS formatu omogućava, a vidjet ćete iz ove prezentacije uočavanje svake parcele koja se tu nalazi. Mi smo dakle, te tehničke stvari usaglašavali, odnosno mi smo usaglašavali metodologiju, šta se to treba uraditi da bude u skladu sa zakonskom regulativom. Planski dokumenti, da vam kažem, višeg reda i nižeg reda moraju po zakonskoj regulativi biti usklađeni. Planski dokument višeg reda u ovom slučaju je Prostorni plan TK i mi smo kao općina dužni svoj plan uskladiti sa tim Prostornim planom. U toku svega toga, došla je inicijativa od privrednika, MZ Stjepan Polje i Gračanice, da se u Stjepan Polju područje Stankovih bara takođe uvrsti kao privredna zona u Prostorni plan Općine Gračanica. U razgovoru sa ministarstvom, pošto još nije bila data saglasnost na plan bilo je da se to uvrsti što smo mi na osnovu Odluke i uradili. Ali kasnije u pribavljanju saglasnosti, rečeno nam je da se ta zona izbriše, jer nije bila ni u ovom usvojenom planu 2003.godine, da bi smo dobili saglasnost i omogućili razvoj ostalih dijelova za koje smo se borili, taj zahtjev ministarstva je prihvaćen, pa ćemo u toku postupka izmjena i dopuna Prostornog plana TK tražiti da se i ova zona kao privredna zona uvede u prostorno plansku dokumentaciju. Prostorni plan se dakle sastoji od prostorne osnove, od knjige Prostornog plana i odluke o usvajanju i provođenju plana. Kao što je već navedeno 23 su karte Prostornog plana i ovo je digitalni oblik plana. Dakle, sve je urađeno u GISU. Naša je obaveza bila po zakonu da Prostorni plan usvojimo do kraja ove kalendarske godine jer po zakonu TK općine koje ne donesu prostorni plan do kraja 2014.godine neće moći izdavati urbanističke saglasnosti i odobrenja za građenje. I da još napomenem da smo mi druga općina koja je na TK dobila saglasnost.

Prva je bila Općina Tuzla, a Općina Doboj Istok je paralelno sa Prostornim planom TK dobila svoj prostorni plan“.

Učesnici u diskusiji su:

Hadžić Ezaneta:

„Molila bih da mi pojasnite područje MZ Stjepan Polje, i to objekti koji su izgrađeni, koji čekaju na građevinsku dozvolu da li će oni sada ući u proceduru i da li će moći dobiti građevinsku dozvolu i šta je sa zemljištem koje se nalazi odnosno da mi kažete dubinu zone koja je dozvoljena za građenje u Stjepan Polju. Da li je to moguće doznati?“

Odgovor na pitanje dala je Muniba Čičkušić, te upoznala sa zemljištem pokazivanjem na karti koja je predmet prezentacije Prostornog plana, naglašavajući da sve to može se provjeriti preklapanjem i legendom koja je na karti i koja označava namjenu svake parcele, naglašavajući da je glavna borba Općini bila u procesu donošenja Prostornog plana, oko zemljišta ispod magistralnog puta u nekim mjesnim zajednicama.

Hasan Fehratović:

„Iznijet ću par riječi u ime Kluba vijećnika SDA. Ne znam koliko je poznato „desetak“ godina traje borba oko ovog prostornog plana. U jednom periodu sam bio i direktno učesnik, ne u izradi, nego u donošenju Odluke i dobro sam razumio ljude koji su imali problema po ovom pitanju, počev od Stjepan Polja, preko industrijske zone, pa do Donje Orahovice. Dakle, prostor je najvažniji resurs kojim ljudi se organizuju i upravljaju. Zato je za pozdraviti okončanje ovog dugog procesa izrade Prostornog plana naše općine. Kroz praćenje stanja u prostoru, odnosno kako je to i članom 103. Odluke o usvajanju i provođenju Prostornog plana Gračanica koju ćemo danas podržati predviđeno, potrebno je u narednom periodu pravovremeno pripremati njegova unapređenja po svim aspektima njegovog sadržaja. Ovdje naravno mislimo prije svega ali ne i jedini na proširenje građevinskih zona, posebno za privredne sadržaje. Iako je društveno i politički potpuno opravdana namjera da se kroz ciljeve prostornog razvoja obezbijedi uravnotežen razvoj cijele opštine Gračanica, nemoguće je ne uvažiti činjenicu da su glavni privredni kapaciteti općine, locirani uz magistralni put Doboj-Tuzla i to na potezu od Stjepan Polja do ulaza u Donju Orahovicu. Kako je ovo područje ustvari jedna proširena poslovna zona, potrebno je u nastavku upravljanja posvetiti značajniju pažnju, kako bi se iz njega izvukao još veći potencijal koji se u toj dionici objektivno i nalazi. Uvažavajući činjenicu što je i navedeno u obrazloženju da Prostorni plan Gračanica mora biti „Izveden“ iz prostornog plana TK, jasno nam je da će naša sledeća aktivnost biti usmjerena na propisne izmjene upravo prostornog plana TK što se može očekivati u 2015. i 2016. godini, kako je tamo i navedeno. Ukoliko se ova aktivnost ne shvati dovoljno ozbiljno, mogla bi postati kočnicom razvoja naše općine jer bi se time ograničila upotreba građevinski i privredno najboljeg zemljišta na općini. Hvala“.

Selimović Senad:

„Vidim u ovom dokumentu da na prostoru općine Gračanica ima 16 urbanih područja. Vidim da su mnoge MZ, nove MZ ostale u sastavu ranijih mjesnih zajednica. Recimo MZ Trnovci je posebna MZ od 2003.godine, zatim Gornji Doborovci, Buk i druge. Mjesna zajednica Gornji Doborovci je u sastavu MZ Džakule a i Doborovci, Buk je u sastavu Džakula, Trnovci u sastavu Džakula. Zašto se nove mjesne zajednice i dalje nalaze u sastavu nekadašnjih mjesnih zajednica? Vidim da ovdje imaju i katastarske granice određenih zaseoka koji čini danas sastavni dio te postojeće mjesne zajednice.

I evo sa ovog mjesta koristim priliku i tražim da se u narednom periodu što prije izvrši administrativno razgraničenje novih mjesnih zajednica, a nadam se da ćete mi dati odgovor na ovo što sam pitao?“

Aida Hodžić, šef Službe za urbanizam je odgovorila na pitanje jer je slično pitanje bilo i na Komisiji za urbanizam i ekologiju. Naglasila je da postoji Zakon o naseljenim mjestima, a za prostorni plan se koriste katastarske podloge. Isto tako je upoznala prisutne da se kreće u aktivnost oko administrativnog razgraničenja mjesnih zajednica i prijedlog Selimović Senada se uzima u obzir da se to uradi u što kraćem roku.

Sulejmanović Osman, predsjednik Komisije za urbanizam i ekologiju je iznio sledeće:  
„Komisija je održala sjednicu 27. 12. 2014. godine i razmatrala je Odluku o provođenju prostornog plana Općine Gračanica za period 2006. – 2026.godina. Komisija nije imala primjedbi na Odluku, te predlaže Vijeću da istu usvoji u ponuđenom obliku naročito uzimajući u obzir posljedice koje bi mogle nastati ne usvajanjem ove Odluke. Komisija nadalje predlaže nadležnim službama da nakon stupanja na snagu ove Odluke izvrši administrativno razgraničenje mjesnih zajednica.“

Tursunović Esad je zatražio obrazloženje za dio Stjepan Polja, vezano za namjenu zemljišta po Prostornom planu Gračanica.

Odgovor je dala Muniba Čičkušić, nakon čega je Odluka o provođenju Prostornog plana Općine Gračanica 2006.-2026.godina usvojena jednoglasno.

#### TAČKA 5

Odluka o pristupanju Općine Gračanica u članstvo Lokalne akcione grupe (LAG) regije Doboj.

Kratko obrazloženje vezano za ovu Odluku dala je Aida Hodžić, šef Službe.

Nije bilo učesnika u diskusiji i Odluka o pristupanju Općine Gračanica u članstvo Lokalne akcione grupe (LAG) regije Doboj je usvojena jednoglasno.

#### TAČKA 6

Plan sanacije gradskog građevinskog zemljišta

Obrazloženje je dala Aida Hodžić:

„Vjerovatno ste upoznati, mada to nije bilo na Općinskom vijeću, da se vode dvojni podaci: Dakle, imamo podatke po katastarskim paralelama koji se vode u bazi podataka katastra nekretnina Općine Gračanica, a drugi podaci se vode u zemljišno-knjižnom uredu u Sudu, odnosno u gruntovnici. Ti brojevi se ne slažu, dakle govorimo o starom i novom premjeru. Nekad je za vrijeme Jugoslavije u nekim općinama izvršeno izlaganje i izjednačeni su podaci u katastru i u zemljišnoj knjizi, odnosno sve parcele su dobile jedinstvene brojeve. Za Općinu Gračanica to nije urađeno i Federalna geodetska uprava uz pomoć Svjetske banke pokrenula je taj proces. On se sad naziva procesom harmonizacije i radi se o izjednačavanju podataka, baze podataka katastra nekretnina i baze podataka koje posjeduje zemljišno-knjižni ured. Općina Gračanica je potpisala sporazum sa Federalnom geodetskom upravom, a i Sud koji je čak i veći nosilac aktivnosti i krenula u harmonizaciju podataka za k.o. Gračanicu i k.o. Gornja Orahovica. Inače će se sve ovo raditi prije svega za sva urbana područja, a onda za ostala područja. U ovom postupku mi smo imali obavezu da uradimo plan za sva zemljišta na kojima su izgrađeni objekti za kolektivno stanovanje, čiji su stanovi bili predmet privatizacije.



Učesnik u diskusiji je:

Krajinović Nihad:

„Sad mi je još draže što sam na početku sjednice uputio inicijativu za izradu registra, jer mi se čini da ovaj Plan sanacije i moja inicijativa idu, kako bi općina konačno vidjela šta joj sve pripada i da koristi na pravi način, mislim da idu u prilog jedno drugome. Ali želim ovo da kažem. Ima primjera jer i sam dolazim iz kolektivnog stambenog naselja, uzurpacije zemljišta onog koje pripada društvenoj zajednici, odnosno Općini Gračanica, a vidim ovdje da je izvršeno fino razgraničenje, odnosno da se konačno zna šta to pripada Općini, odnosno zgradi ili naseljima, a šta pripada vlasnicima koji žive tu. I naravno imam prijedlog koji ću dati na narednoj tački dnevnog reda, a usko je vezan sa ovim“.

Plan sanacije gradskog građevinskog zemljišta usvojen je jednoglasno.

## TAČKA 7

Program rada Općinskog vijeća za 2015. godinu

Predsjedavajući Vijeća Edin Ibrišević je naglasio da je dostavljen dopis i svim vijećnicima za prijedloge na Program rada, te prijedloge koji su pristigli ugrađeni su u Program. Program je otvoren i može se i na samoj sjednici predlagati tema o kojoj će raspravljati i odlučivati Općinsko vijeće u narednoj godini.

Krajinović Nihad:

„Ja bih predložio još jednu tačku koja bi se uvrstila u Program rada za 2015. godinu. Odnosi se na korištenje stambenog kolektivnog prostora, kolektivnog stanovanja onoga što pripada kolektivnog naselja. Naime, i građani koji žive u stambenim naseljima moraju preuzeti odgovornost za ovo područje u kojem oni stanuju. Isto kao što vlasnici privatnih individualnih stambenih objekata održavaju svoja dvorišta, tako i građani stambenih naselja u gradu moraju preuzeti odgovornost da održavaju, odnosno čuvaju. Ovim sam mislio i na to, što mi u Gračanici, osim možda jednog naselja, nigdje nisu zaživjeli kućepazitelji. Stanari se nisu mogli dogovoriti. Ja mislim da to treba, ako ne postoji zakon, a vjerujem da postoji. Treba riješiti pa ako treba i odlukom formulaciju tačke možete sami odabrati i da se raspravlja u septembru“.

Sulejmanović Osman:

„Ja prvo imam primjedbu na Program rada. Čini mi se da Informacija o uništavanju pasa lotalica dva puta je unešena da će se razmatrati, u septembru i u maju. Ja predlažem da se u Program uvrsti još pet tačaka. I to Odluka o organizovanju parking službi u gradu i to u januaru ili februaru. Zatim Informacija o stanju javne rasvjete u gradu i MZ sa osvrtom na potrošnju električne energije. Treće, Informacija o radu u MZ. Imam indicija da V MZ malo gdje rade, četvrto Informacija o prikupljanju i odlaganju otpada iz domaćinstava i privrede i peto Informacija o stanju putne infrastrukture na području općine Gračanica“.

Gadžić Rahim:

Na januarskoj sjednici da se planira tačka „Odluka o izmjenama Statuta Općine Gračanica“. predlagatelj da bude sekretar Općinskog vijeća, obrađivač Stručna služba i da se planira u januaru“.

Predsjedavajući vijeća je dao pauzu u trajanju od pet minuta.

Nakon pauze, predsjedavajući Općinskog vijeća Gračanica je predložio da se usvoje prijedlozi i sugestije za Program rada Vijeća u 2015. godini i to u kompletu, s tim da se korigovao naslov Odluke Sulejmanović Osmana, tako da glasi „Odluka o upravljanju parking prostorima“.

Program rada Vijeća za 2015. godinu uz gore predloženo, usvojen je jednoglasno.

## TAČKA 8

Programske aktivnosti Općinskog načelnika za 2015. godinu

Nije bilo učesnika u diskusiji i Programske aktivnosti Općinskog načelnika za 2015. godinu su usvojene jednoglasno.

## TAČKA 9

Informacija o stanju zaštite građana od neeksplozivnih i minsko eksplozivnih sredstava na području općine Gračanica u 2014. godini.

Nije bilo učesnika u diskusiji i Informacija o stanju zaštite građana od neeksplozivnih i minsko eksplozivnih sredstava na području općine Gračanica u 2014. godini je usvojena jednoglasno.

S obzirom da je završeno razmatranje dnevnog reda 26. sjednice, predsjedavajući Vijeća je upoznao prisutne da su pojedini građani zatražili da se obrate Općinskom vijeću Gračanica.

Za diskusiju se javio:

Šestan Rukib iz Donje Lohinje:

„Hvala vam što ste mi omogućili da vam se obratim ispred zabrinutih građana MZ Donja Lohinja i Pribava. Tragom vijesti da se priprema izgraditi fabrika na granici između Donje Lohinje i Pribave koja će spaljivati gume i plastiku a proizvoditi gorivo, mi smo građani ove dvije Mjesne zajednice zabrinuti i preplašeni. Pojedincima je malo što smo vodeći u kantonu po ružnim bolestima, po plućnim bolesnicima, što nam je ovih dana tri puta veća doza ugljen-monoksida, što nam je dolina Spreče kontaminirana. I ovo malo čiste poljoprivredne zemlje hoće da nam zatreju. Mi građani ove dvije Mjesne zajednice vas upozoravamo dok je vrijeme da obustavite ovaj projekat. Većina stanovnika iz ove dvije Mjesne zajednice se bavi poljoprivredom, izdržavaju svoje porodice. Izgradnjom ove fabrike rekli bi zbogom proizvodnji kupusa, paprike, patlidžana, mlijeka, voća, meda, zbogom pitka vodo. U prečniku 200 metara, nalazi se oko dvadeset bunara. Izvori koji non-stop teku, rekli bi zbogom pčelama i bumbarima, a vi znate zašto ih spominjem. Oni oprasuju i toga nebi bilo, a nebi bilo ni priroda. Zbogom hrana za EU, zbogom organska hrana jer smo mi već ušli u proizvodnju organske hrane. Mlijeko nam je već četiri godine u statusu mikroorganizama i bakterija. Sa iskustvom Tuzle i Lukavca, Zenice i ponašanjem gazdi firmi prema građanima ovih gradova, strah nam je još veći. Znamo da su iste gazde željezare u Zenici i Mančesteru, ali tamo ide čisti zrak, a u Zenici vidimo svi kakav je. Sve ovo što govorim sam poučen i ličnim iskustvom kojeg nosim iz Lukavca jer tamo prodajem na pijaci. I ovaj što želi praviti fabriku će obećati, a prljav i otrovan zrak nema granica. Zagadit će on i vama i u svim dijelovima opštine, ali mi smo na udaru. U ime naše drage omladine, u ime svih zdravih da ne obole, u ime bolesnih da im ne otežavamo disanje, da lakše ozdrave, u ime nerođene djece da im ostavimo čist zrak, vodite računa o sledećim vašim odlukama i potezima. Mi građani ove dvije Mjesne zajednice moramo se boriti za svoj opstanak na ovim prostorima, za svoju porodicu. Molim vas da donesete ispravne odluke. Smatramo vas odgovornim za slijedeće naše poteze u slučaju negativnog odgovora. Ne znam dali ima koji zastupnik ovdje koji je ispred poljoprivrede? Neka digne ruku. Znači nema niko. Šta vi gospodo mislite jesti za 20-30 godina? Ja gledam ovaj plan, poljoprivrednog zemljišta nestaje. Vi vidite u kakvoj smo mi poziciji poljoprivredni proizvođači. Niko se nije ovdje javio i predložio kako će nam pomoći. Šta smo mi očekivali, da neko ustane i kaže bar četiri feniga za litar mlijeka na nivou koliko mi prodamo oko 3 miliona, to je 120.000,00 minimalno ali bi nam pomoglo mnogo. Neka vas je stid i sram zastupnici, što ni jednu riječ nisam čuo da ste se zauzeli za poljoprivredu, a znate u kakvoj smo poziciji. Mi smo u kreditima, ne znamo ni sami šta ćemo. Izdržavamo porodice, a očekivao sam od vas bar neku riječ u korist nas. Niko se nije od vas javio. Hvala vam“.

Tursunović Esad:

„Zbog čega mene da bude stid i sram? Kad je neko iz poljoprivrede ovdje sa konkretnim zahtjevom došao. Neki dan sam sa Fadilom Ahmetaševićem razgovarao, šta trebam iznijeti. Iznijet ću sve, ali se mora napisati. I ja imam kredita. Šezdeset ljudi imam, ko mi je kriv? Sram je vašeg nastupa što vi govorite stid vas i sram bilo. Vi ste nekorektni. Ima ljudi koji nisu to zaslužili“.

Hajdić Šemsudin:

„Evo me drugi put pred vama ovdje. Izlazim sa građanskim pitanjem i sa tzv. građanskom inicijativom. Već dugo vremena se borim za taj svoj prilazni put, svom stambenom objektu koji je izgrađen po svim regulacionim planovima, po svoj papirologiji koja je potrebna. 2004. godine je izgrađena i urađena parcelizacija te parcele na kojoj ja živim i te godine je ta parcela uvrštena u prostorni plan, katastarski prostorni plan. Nije moguće da je u toj parceli dodijeljeno trinaest placeva, a da ta parcela apsolutno nije dobila pristupni put kući, odnosno da ima sa javnog puta prilaz. Ja sad postavljam pitanje službi, gospodinu načelniku i svima ostalim, odnosno i vama vijećnicima, da li je to moguće? Ako sam ja znači dobio građevinsku, urbanističku i sve ostalo, kako sam ja onda sve to mogao dobiti, ako ta parcela nije imala pristupnog puta? Znači ovim putem ja ponovo izlazim pred vas i postavljam to isto pitanje. Moja inicijativa je da bi se mogao dodijeliti pristupni put mojoj kući, potrebno je sasvim malo, to je jedna dionica puta koja je uplanjena i da se pokuša otkup tog dijela puta prema mojoj parceli. Ja se zahvaljujem što ste me saslušali i molio bih odgovor na ovu moju inicijativu“.

Aida Hodžić, šef Službe za urbanizam je odgovorila:

„Gospodine Hajdiću, vi ste dobili urbanističku saglasnost i građevinsku dozvolu za rekonstrukciju postojećeg objekta kojeg niste vi pravili nego ste ga kupili ili naslijedili, nebitno. Dakle, naslijedili ste i sve ono što je postojeći objekat imao, i pristupni put i način prilaska parcelama. Parcela se istina nalazi u okviru regulacionog plana „Bazen 3“ i cijepanje parcele radi podjele među nasljednicima je napravljeno po tom planu, ali izgleda da je put koji je planiran ostao kao vlasništvo svih nasljednika, a praviti će se nekad kad oni budu htjeli. Tu jeste predviđena nekad izgradnja mosta i prilaz tim parcelama preko rijeke Sokoluše ali kad dođe vrijeme za to i kad se steknu uslovi za to. Vaš objekat je nažalost usamljen. Naslijedili ste prilaz kakav je bio. Vi ste napravili most da bi ste sebi olakšali pristup, ali tu je korito rijeke Sokoluše široko 26 metara, prema katastarskim planovima. Vaš je most širok nekih 14 metara. Činjenica je da je rijeka Sokoluša napravila dva rukava, i na poplave je dva puta intervenisano do sada, ali oba puta to što je intervenisano Sokoluša je pokvarila“.

Odgovor je dao Općinski načelnik Nusret Helić:

„Aida je rekla ono što jeste i kako se odvijalo, ali evo ima potrebe da se rješava njegov slučaj, obzirom da je tamo kuća, da postoji i obzirom da je rijeka odnijela most. Nije se u mogućnosti raditi drugi most zbog niz drugih stvari ali ima prostora da sa vlasnicima razgovaramo. I u programu mog rada, između ostalog je i to, da pokušamo riješiti planirani put, otkupom. Ima naznaka da će ljudi prihvatiti i treba to platiti. Ali evo kažem krenut ćemo u to čim uslovi budu riješeni, mislim imovinsko pravni odnosi. Sve je ovo tačno, ali mora se riješiti jer čovjek nema odakle doći. Dakle, ući ćemo u taj projekat pa ćemo informisati na koji način“.

Gadžić Rahim:

„Ja bih Aidi šefici postavio pitanje vezano za ovu fabriku. Ja prvi put čujem za tu fabriku, pa me zanima, dali je neko podnio zahtjev i šta se dešava. Ovo što smo sad čuli ovu informaciju, to su zabrinjavajuće stvari. Ja kao vijećnik prvi put to čujem pa ako možete da nam date obrazloženje u vezi s tim“.

Aida Hodžić:

„Ne bih ni ja znala za predmet da nije došlo do zahtjeva građana da se uključe u postupak i da su rekli da je u pitanju prerada gume i plastike. U Službu je stigao zahtjev za izdavanje urbanističke saglasnosti za izgradnju proizvodnog objekta u Donjoj Lohinji na zemljištu koje je građevinsko i na kojem je dozvoljena gradnja. U samom postupku Služba je od podnosioca zahtjeva, pravni subjekat je u pitanju tražena je tehnološka šema da se vidi šta će to biti u tom proizvodnom objektu da bi se

postupilo dalje u skladu sa zakonskom regulativom. Prije svega, ako niste upoznati postoji obaveza institucije izdavanja okolinske dozvole za objekte koji ugrožavaju čovjekovu okolinu. Prema tome, što nam bude dostavljeno tražit ćemo pribavljanje okolinske dozvole. Nadležnost za izdavanje okolinske dozvole i postupak provođenja javne rasprave i uključivanja javnosti je na Ministarstvu za prostorno uređenje i zaštitu okolice TK-a. Ovo je to što se zna, a mi još nemamo prave informacije. Nikakav dokument još nije izdat“.

Šestan Rukib:

„Ja ne mogu razumjeti kako će neko čovjeku dozvoliti kad su tu prve kuće jer ima tu pet, šest izbjeglica koje su napravile kuće do same međe i još nisu ni uselili, a već da gutaju taj otrov. Mi imamo informacije i bez njih ja ovdje nisam došao. Informisao sam se, jer ta fabrika ima već u Lukavcu. I znate šta ljudi kažu? U određenom vremenu nema reagovanja, ali iza pola noći kad se puste otrovi, suze oči, grlo peče, što znači da je to čist otrov. Ko može dozvoliti to tu, gdje je moja kuća na 20 metara udaljenosti, a druge na 30, to je naselje. Mi reagujemo na vrijeme, da nebi čovjek uložio sredstva. Sigurno neće i mi građani nećemo dozvoliti, a investitor je Todorović koji namjerava ta sredstva uložiti u sportsku dvoranu, zatim u pijacu koja je u jako lošem stanju, moram i to priznati. Mi smo u strahu i sva naša proizvodnja pada. Neka pravi bazen za plivanje, ili tenisko igralište, a ne samo otrove. Ja se izvinjavam što sam reagovao ovako“.

Za riječ se javila Mejra Mujić iz Donje Orahovice i iznijela sledeće:

„Dolazim ispred građana Mjesne zajednice Donja Orahovica i ispred „Plenuma“ građana Gračanica. Ja ću kratko. Uputila sam jednu građansku inicijativu, ustvari zahtjev Vijeću Mjesne zajednice, 28.11.2014.godine za smjenu predsjednika Mjesne zajednice Orahovica Donja, međutim ni dan danas nisam dobila odgovor. Uz moj zahtjev sam predala i određeni broj potpisa koje smo mi aktivisti skupili, znači peticiju za smjenu predsjednika Mjesne zajednice Orahovica Donja pozivajući se na član 26. Statuta MZ Donja Orahovica. Znači nisam dobila odgovor. Sledeći naš potez je bio da su građani uputili građansku inicijativu predsjedavajućem Općinskog vijeća za smjenu predsjednika i kompletnog Vijeća MZ Orahovica Donja. Razloge ću obrazložiti u tri rečenice. Vijeće MZ Orahovica Donja ne radi od maja meseca. Zadnji puta su imali krnji sastav jer su vijećnici SDA odbili prisutnost, a i ne zovu ih na sastanak Vijeća MZ Orahovica Donja. Između ostalog svi ste čuli da su se desili protesti u Donjoj Orahovici dva puta zbog nepravilne raspodjele crijepa. O tome se vodi istraga i o tome ćete biti obaviješteni. Sledeće što bi rekla je, građani MZ Orahovica Donja zamjere što se nije održala javna rasprava o nacrtu budžeta koje je predložilo Općinsko vijeće. Do sada je bila praksa da barem vijećnici održe rasprave o nacrtu budžeta. Međutim, s obzirom da naše Vijeće ne radi u svom sastavu, možda se sastalo 5-6 ljudi i evo vidimo da nemamo nikakve inicijative upućene. Ja sam uputila tri stavke, a gospodin načelnik je rekao da sam tražila 70.000,00 sredstava, međutim to su sredstva u okviru budžeta, s jedne stavke oduzeti dodati na drugu, tako samo da pojasnim. I što bih htjela ovdje naglasiti, a to ću pismenim putem isto se očitovati. U Donjoj Orahovici, Miričini i Rašljevi nastupila je glad, pa vi o tome raspravljajte a ja ću opet uputiti građansku inicijativu. Kompletan ljetina tih mjesnih zajednica je uništena, i što nije odnijela poplava, uništio je led“.

Gazibegović Admir:

„Ja neću planirati ništa oko ovoga, jer sam ja već objasnio šta se radilo od maja meseca, dovoljno sam rekao i ne bih da se ponavljam. Drugo, 2.11. ja sam podnio pismenu ostavku na mjesto predsjednika Vijeća MZ Donja Orahovica. Vijeće Mjesne zajednice još se nije sastalo od te moje ostavke iz razloga što ne možemo sazvati vijećnike. Toliko. Hvala“.

Senada Dobrnjić iz Donje Orahovice se zahvalila za dodjelu stipendije njenoj kćerki. Zahvalila se i Plenumu Gračanice koji joj je pomogao oko inicijative, te zamolila da i ubuduće pomaže Općina i drugim građanima vezano za stipendije.

Predsjedavajući vijeća je uputio čestitku svima prisutnima za nastupajuću Novu 2015. godinu.

Za riječ se javio Tursunović Esad i iznio sledeće:

„Ovo ovdje postade kao pijaca. Dolazi ko hoće, radi šta hoće, priča šta hoće i drži mi predavanje da sam ja bezobrazan, da sam ovakav, da sam onakav. Slažem se da treba udovoljiti i pomoći narodu. Dođe ovdje i drži predavanje kaže ti dobijaš 200-400 maraka paušal i slično. Otkud tolika hrabrost, ipak smo mi legitimno izabrani vijećnici, odnosno predstavnici naroda. I kaže u oči tako drsko i bezobrazno, vi ste bezobrazni. Zašto se dopušta više ulazak na sjednicu. Ili da damo svi ostavke ili neka dođu građani ovdje, raspíšemo vanredne izbore ili nešto da se uradi. I meni svašta može stati pod kapu, ali kad izađem ovdje biram riječi. Molim vas dajte da o ovome povedemo računa. Kao kafana postalo“.

Krajinović Nihad:

„Radne kolege, radno predsjedništvo, na kraju, načelnice, dragi građani, ja vam svima u ime Kluba SDP-a Općine Gračanica, želim poželjeti sretnu novu 2015.godinu, sa više razmišljanja, tolerancije, razmjene međusobne solidarnosti i dobrih rasprava na Vijeću, dobrih i kvalitetnih odluka u ime društvene zajednice naših građana. I što manje briga, koje su nas pratile u 2014.godini“.

Ezaneta Hadžić:

„U ime Kluba SDA, takođe se pridružujem čestitkama i da nam nova 2015.godina bude što bolja i puno bolja nego što je bila 2014.godina“.

Općinski načelnik Nusret Helić:

„Evo i ja ću u svoje lično ime i u ime građana da vam čestitam i zaželim sretnu 2015.godinu. Da se zahvalim na kvalitetnom radu. Ne kažem ovo džabe, ovo je primjer kako Vijeće može funkcionisati. Kako može i parlamentarna većina i pozicija zajednički raditi u interesu dobrih projekata. Kažem rijetko je naći ovakvo Vijeće da funkcioniše, bez obzira na pojedine iskrice, bez obzira i ovo što se neko javi. Ipak je ovo primjer demokratizacije, a i ova gospoda što dođe i iznosi, u pravu su iznositi, ali mora se biti u nivou. Dakle, ne može niko nikom reći da je ovakav ili onakav. Ne možete vi reći vijećnicima, sram vas bilo. Kako možete tako reći? U svakom slučaju i vama želim da imate što manje problema, a mi ćemo se truditi da budemo zajedno s problemima građana. Evo donijeli smo ključne dokumente potruditi ćemo se da ih realizujemo. Sve drugo mimo tih ključnih dokumenata budžeta, je prazna priča. Ne možemo mi u toku godine reći treba mi gradnja nekog gore puta, kad smo budžetom predvidjeli nešto drugo. Ali svi zajedno istrajali za ovo što smo usvojili. I budžet i program jedan, program drugi, u normalnoj atmosferi, toleranciji i da budemo odgovorni. Želim vam svako dobro i vašim porodicama i svima vama da bude što manje problema“.

Sjednica je završena u 14,15 sati.

Zapisnik vodila: Mevlida Naimkadić

Tonski snimak sjednice uredno je arhiviran.

ZAPISNIK VODILA:

Mevlida Naimkadić

PREDSJEDAVAJUĆI  
OPĆINSKOG VIJEĆA  
mr. sc. Edin Ibrišević

